

# Ils trocchists da Cuira

Umens da la Cadi e d'Andiast sa radunan per dar troccas

DA CLAUDIA CADRUVI / ANR

■ **Mintga venderdi saira sa radunan intgins trocchists en il Feldschlössli a Cuira. Els vegnan per dar in scart e per star da cumpagnia. Il venderdi passà ha l'anr fatg ina visita als scartists.**

Dapi blers onns datti il Club da troccas da Cuira. *Giusep Monn* vegn da Tujetsch ed è il vegl da la runda. Già dapi il 1965 dettia el troccas en quest club, raquinta Monn.

*Norbert Berther e Tumaisch Berther* vegnan da Camischolas. Cun lur bel dialect da Tujetsch raquintan els co els devan pli baud troccas a «tgesa».

En buna memoria ha Norbert Berther il temp da tschaiver. «Lura envidavan las famiglias en ina l'autra, ed ins gieva a dar troccas.» Damai che las famiglias eran pli grondas ch'ozendi, ed ils uffants astgavan era dar troccas, devi trais fin quatter partidas. Suenter il dar troccas surveva la famiglia che aveva envidà in bun puschegn da tschaiver. Ma durant la curaisma na vegneva mai dà troccas, di Berther.

## Troccas fin suenter mesanotg

Era *Sep Bundi* da Surrein sa regorda ch'el ha emprendì gia da buob en famiglia da dar troccas. Suenter, sco mat, è el lura ò en l'ustaria a sigliantar il bagat. Cunzunt en l'ustaria dal legendar ustier e fraudader Placi Pign vegniva mintgamaì dà troccas fin tard viaden la notg. Dad uras da polizia vegniva fatg pauca feda. Mintgatant, sch'i gieva gia encunter la damaun, tagliava Placi Pign si ina bella platta charn per ils scartists.



Il venderdi saira en il Feldschlössli: Sursilvans che dattan troccas.

FOTO C. CADRUVI

## Dar chartas avon ch'ir en l'emprima

*Anton Deplazes* da Rabiun dat da tuttas sorts gieus. «I na sto betg exnum esser troccas», di el. El dettia era gugent jass u mulin. En il Feldschlössli vegn el cunzunt per star in pau cun auters Sursilvans. Ina giada u l'autra dat el là era mulin.

Per *Toni Lutz e Tarcisi Lutz* da Curgaglia è il dar troccas in divertiment. «Sch'jau ma sun grittentà l'entir di, drov jau la saira insatge per mai», di Tarcisi Lutz tranter spass e da tschert: «Ins na

viva betg mo per lavurar.» Era el è creschì si cun troccas, «e peschaletg savevan nus gia dar avant ch'ir a scola».

*Alexi Vincenz* vegn era pervi da la cumpagnia en il Feldschlössli. El è creschì si ad Andiast. Là enconuschian ins per part autras reglas da troccas e da tschantschar, di el.

## Implantà il virus

D'ina tut altra cuntrada deriva *Willi Ehrler*, numnadamain da Küsnacht. Oz viva el a Cuira. El è il sulet trocchist che

n'ha betg emprendì gia «en tgina» il gieu. Pir cura ch'el ha maridà sia dunna d'Andiast, è el vegnì confruntà cun troccas. La famiglia da sia dunna ha implantà en Ehrler il virus da troccas. Perquai va era el mintga venderdi a dar in scart.

Ehrler ha fatg in curs da sursilvan en la Lia rumantscha e discorra sa chape-scha rumantsch durant dar chartas. «Dar troccas san ins la finala mo per rumantsch», da gliez èn tuts trocchists en la runda persvadids.